

Actualidáenseñanza

Educación nun dixo qué va pasar col profesoráu de Llingua nel cursu 2009-2010

SUATEA y CC OO reclamen la especialidá d'Asturianu y qu'entre na plantiya orgánica

B. R. V

Acaba'l cursu escolar ensin que'l profesoráu de Llingua Asturiana tenga claro cómo se van organizar los centros nel 2009-2010. Y ye qu'a últimos del 2008 el Tribunal Supremu declaró «contraries a derechu» les plantiyes funcionales n'educación y consideró ilegal la regulación de la figura de sobrantes d'horariu y de les especialidaes afines, quier dicise, les formaes por profesoráu qu'entra y sal del centru según les coxuntures específiques. Sicasí, Educación entá nun informó de cómo va aplicar una sentencia pola que'l profesoráu de Llingua Asturiana y Gallego-Asturianu había integrase na plantiya orgánica del centru, mentes qu'agora esti cuerpu ta «condenáu» a la interinidad, diz Maite Duarte, responsable de la Secretaría de Llingua Asturiana de SUATEA.

Al ciarrar esta edición, la Conseyería d'Educación tovía nun dierra nenguna respuesta sobre qué van facer cola asignatura d'Asturianu. Otra manera, bona parte del profesoráu d'esta materia secundó la convocatoria fecha por CC OO y SUATEA pa concentrarse énte la Xunta Xeneral reclamando la creación de la especialidá. Igualmente, según s'informa dende SUATEA, el diálogu ta cortáu con Educación, que nun se punxo en contactu colos sindicatos pa esplicar cuál va ser l'estatus del profesoráu d'Asturianu nel cursu escolar entrante.

La demanda de los sindicatos ye que les places d'Asturianu y Gallego-Asturianu formen parte de la plantiya orgánica y sían vacantes col estatus de places de plenu dere-



Concentración del profesoráu d'Asturianu convocada por CC OO y SUATEA.

chu a tolos efectos. Según SUATEA y CC OO esto diba ser «un pasu fundamental pa garantizar y dignificar la presencia de la llingua nel sistema educativu asturianu».

Esta ye la «condición necesaria», al parecer de SUATEA y CC OO, pa «lograr la normalización educativa, pero nun ye abondo». Estos sindicatos afirman qu'ha crease la especialidá de Llingua Asturiana y de Gallego-Asturianu y qu'han convocase oposiciones d'esta especialidá. «Asina la nuestra llingua trataríenla en condiciones d'igualdá con respecto a les otre especialidaes».

Esta demanda softitala'l Conseyu Escolar del Estáu, órganu máximu de representación de la comunidá educativa nel Estáu español, qu'aprobó la creación de la especialidá de Llingua Asturiana y Gallego-Asturianu. Igualmente, tal como recuerden les centrales sindicales, organismos europeos solicitaron una protección mayor pa estes llingües y la Universidá va formar especialistas pa poner clas d'estes materies que, paradóxicamente, nun tienen especialidá.

Amás de pidir la especialidá, la so inclusión nel Decretu Estatal

d'especialidaes, la convocatoria d'oposiciones y un concursu de tresllaos de Llingua Asturiana y Gallego-Asturianu, SUATEA y CC OO reivindicquen qu'estos tean n'Educación Infantil, Primaria, Secundaria, Formación Profesional, Enseñances de Réxime Especial, Escueles d'Idiomes y d'Adultos. Y, otra vez más, pidieron la oficialidá. Los sindicatos tamién criticaron la existencia de ratios p'abrir grupos.

Otra manera, parte de la Plataforma de Docentes de Llingua Asturiana tamién acudió a la concentración.

LLINGUA Y SOCIEDÁ

Los Conseyos de la Moce dá apuesten pol plurilingüismu

El Consell Nacional de la Joventut de Catalunya, el Consell de la Joventut de les Illes Balears, l'Euskadiko Gazteiraen Kontseilua y el Conseyu de la Moce dá del Principáu d'Asturies firmaron el día 10 de mayu un manifestu pol plurilingüismu col que se punxo'l ramu a les I Xornaes de Moce dá y Llingües Minorizaes que se celebró nel Auditoriu Príncipe Felipe d'Uviéu. Nel manifestu, los colectivos reivindicquen la necesidá de que se dea «reconocimientu plenu pol Estáu de la realidá plurinacional, pluricultural y plurilingüística de les naciones históriques del Estáu español que tienen una realidá bilingüe o plurilingüe nel so territoriu».

FOTOGRAFÍA

Uviéu acueye una edición nueva de «Miraes»

El palaciu del conde de Toreno d'Uviéu acueye estos díes la edición de 2009 de *Miraes*, la esposición qu'entama cada añu l'Asociación de Fotoperiodistes Asturianos con delles imáxenes tomaes l'añu anterior. Esti añu la muestra axunta 95 fotos sacaes por 38 socios del colectivu. La inauguración valió de marcu pa entregar el premiu Ramón González a Jesús Manuel Pardo por una de les fotografíes que pueden vese na esposición.

LLEVA LA TO BANDERA

Anima al Sporting más que nunca y vistí Xixón colos colores del to equipu

Anima al Sporting cola bandera blanca y encarnada que t'ofrez El Comercio n'esclusiva. Garra la cartía que te vamos dar el domingu 17 col to periódicu, complétala con 5 cupones y, namás que por 1,90 euros, vas tener la bandera d'apoyu al to equipu.

Midíes de la bandera: 1 x 0,80 metros / Nun inclúi mástil o palu.

Promoción válida hasta acabar les existencies.

Collabora:

Ayuntamiento de Gijón

EL COMERCIO